

# Inkomprensibel

Maske Beibel ta konsiderá un Buku sagrado, hopi hende ta keda konfundí ora nan ta les'é. Un motibu pa nan konfushon ta pasobra nan no ta komprensé algun punto básiko.

1) **Beibel ta un Buku sobrenatural.** Nos ta yam'é “Palabra di Dios” pasobra Dios ta Su Outor. “*Tur Skritura ta inspirá pa Dios...*” (2 Timoteo 3:16). “Inspirá pa Dios” ta nifiká “rosea di Dios”. Pasobra Dios ta Outor di Beibel, nos por ta sigur ku Skritura ta outoridat final pa nos kondukta i kreensia.

2) **Beibel ta un Buku natural.** Maske Dios ta Outor di Beibel, El a usa hende pa skirbi Su palabranan. Papiando di esaki, Palabra di Dios ta bisa ku “*...hòmbènan santu di Dios a papia, inspirá dor di Spiritu Santu*” (2 Pedro 1:21).

**Pasobra Dios a usa hende pa skirbi Beibel, nos mester komprensé manera kualke komunikashon humano pa saka afó loke e outor ke men.**

Un eror ku hopi hende ta hasi lesando Beibel, ta ku nan ta kere ku e palabranan den Skritura mester tin un nifikashon skondí. Por ehèmpel, ora Skritura ta papia di e fruta prohibí ku Eva a duna Adam, nan ta haña ku esei mester nifiká algo otro... ku nan a tene relashon seksual. Unda nan ta haña e idea ei? For di nan mes imaginashon. Un otro persona por imaginá ku esei ke men ku Eva tabata manda riba Adam...un otro idea kiboká.

**Ora bo ta inventá nifikashonnan skondí pa un teksto di Skritura, bo ta obligá Beibel bisa loke bo imaginashon ta dikta...na lugá di pprmiti'é komuniká loke Dios ke!**

E pregunta prinsipal ta, kiko tabata den mente di e outor humano ku a skirbi e teksto? Sin duda el a komprensé ku Eva a duna Adam e fruta literal. No tin nodi di buska un nifikashon simbóliko!

Pasobra Beibel tambe ta skirbí dor di **hende**, nos mester tene kuenta ku reglanan di lingwístika. Un regla masha importante pa komprensé Beibel ta ku bo **semper mester kuminsá ku e nifikashon normal, natural, i riparabel di e idioma.** Nos por komprensé mayoria palabra di Beibel na un forma literal—e manera normal ku hende sa komprensé palabranan. Solamente si bo **no por** komprensé e teksto na un forma literal, anto e ora ei numa bo ta buska un nifikashon simbóliko.

Nos ta hasi e mesun kos tur dia den nos kombersashonnan. Por ehèmpel, normal ora nos ta usa e palabra “kables”, nos ke men e órgano físiko. Ma nos tambe tin uso simbóliko pa “kables”: “kables di skol”, “kables di hacha”, “kables di boto”, “kibra kables”, èts. Maske e ekspreshonnan ei ta simbóliko, tòg kada un di nan tin un nifikashon literal.

Ta meskos ku Beibel. **Kada teksto di Beibel tin solamente 1 nifikashon literal**—ku eksepsion di tekstonan ku e Outor mes ta indiká ku tin un otro nifikashon. Ta nos tarea pa yega na e 1 nifikashon den Palabra di Dios.

Un otro motibu ku tantu hende tin problema pa komprensé Beibel ta pasobra nan no konosé su Outor. Palabra di Dios ta bisa ora hende ku no a konfia den Hesu-Kristo pa salbashon ta lesa Skritura “*...tin un velo riba nan kurason, ma ki ora ku un hende kombèrtí na Señor e velo ta wòrdu kitá.*” (2 Kortintionan 3:15-16). Si bo ke komprensé Beibel, bo tin ku konosé Señor Hesu-Kristo.

Ademas, Skritura ta bisa, “*..ora...e Spiritu di bèrdat bin, E lo guia boso den tur bèrdat...*” (Juan 16:13). Sin Spiritu Santu Su guiansa, nos esfuersonan pa komprensé Skritura ta enbano. I Beibel ta bisa bon kla di e hende ku no ta pertenesé na Kristo ku e “*...no tin e Spiritu di Cristo...*” (Romanonan 8:9).

Semper lo keda teksto den Palabra di Dios ku E so sa nan nifikashon. Ma tin muchu mas kos ku bo por komprensé si bo les'é pa bo mes. Beibel no mester keda un Buku inkomprensibel.